

Relatorio Trimestral ba dala uluk Fundo Petroleo nian

COMUNICADO DE IMPRENSA

Autoridade Bankaria no Pagamentos (ABP) iha loron ohin publika Relatorio Trimestral ba dala uluk kona ba Fundo Petroleo Timor-Leste nian nebe hatudo katak oras ne'e dadauk osan riku soin petroleo nian hamutuk dolar Amerikanu \$247 milhoes.

Relatorio ne'e hatudo katak governo transfere tiha ona osan \$205 milhoes ba Fundo Petroleo nian iha loron 9 Setembro inklui \$80 milhoes simu hosi etapa ba dala uluk nebe durante tempo ne tau hamutuk hela iha konta espesial "Timor Gap" iha ABP iha tinan 2000 nian. Tuir mai companhia sira mos selu imposto diretamente ba Fundo ne'e \$43 milhoes resin liu hosi konta ABP nian iha Federal Reserve Bank Estados Unidos, Nova Iorque

Tuir relatorio ida ne'e, Diretor Geral ABP, Sr. Abraão de Vasconcelos, afirma katak: "Fundo ida ne'e operacionalmente hala'o tiha ona e iha trimestre ba dala uluk ida ne'e nia laran, hetan ona osan funan \$600,000 resin nebe investe fila fali iha Fundo ne'e."

Fo hanoin hikas fali katak, ABP servisu hamutuk tiha ona ho Ministério do Plano e das Finanças liu hosi prosesso preparasaun kona ba Lei Fundo Petroleo, nebe hamosu consulta publica ida ke kle'an liu, molok atu hato'o ba Parlamento Nacional hafoin promulga iha fulan Agosto. Hau hakarak dehan mos katak sistema ho prosedur kona ba gestaun ho investimento kona ba riku soin Fundo Petroleo nian iha ABP hala'o tiha ona.

Lei Fundo Petroleo espesifica katak ABP, nudar futuro banco central Timor-Leste nian, hanesan agente responsavel ba gestaun operacional Fundo nian. Impostos ho royalties kona ba riku soin petroleo Nasaun nian sei deposita hotu iha konta bankaria ida mesak nebe ABP loke iha Federal Reserve Bank, Estados Unidos. Ida ne'e hanesan kondisaun adicional ida ba transparensia nebe receita petroleu nian la precisa liu hosi Receita Konsolidada antes atu tama ba Fundo.

Ministra do Plano e das Finanças, nebe hetan tulun hosi Komite Assessoria ba Investimento, nudar responsavel atu hakotu estrategia tomak ba investimento Fundo nian. Mandato ba periodo ba dala uluk nian preve katak valor bot hirak ne'e so investe deit iha titulos governo nian (obligasi pemerintah) iha Dolar americano. Atu hatene klaru liu tan, bele hare Contrato Gestaun nebe Ministra ho ABP assina tiha ona iha loron 12 Outubro tinan 2005.

Sr. Vasconcelos hatutan tan katak "ABP consegue duni manan fali quase hanesan sasukat hosi referencia iha periodo ba dala uluk ne'e, ida nebe hatudo katak ABP nia servisu hala'o gestaun Fundo nian tuir duni mandato nebe simu.

Hanesan mos index bar-barak hosi mercado financeiro hasoru, nune'e mos index bolsa valor nian (pasar bursa), index obligasi nebe mak hili tiha ona hanesan sasukat referencia ba Fundo Petroleo nebe lor-loron tun sa'e tuir condisaun mercado nian. Hanesan resultado hosi mercado ida nebe mak hasoru iha Estados Unidos durante fulan Setembro,

valor sasukat referensia tun kedas tersu ida hosi por sentu ida. Situasaun tun sa'e ida ne'e la'os preocupasaun bot ida ba Timor-Leste tamba ABP nia hanoin atu manten investimento hirak ne'e to'o nia tempo nune'e bele recupera valor capital obligasi nian no mos osan funan nebe simu tiha ona durante investimento nia moris.

Sr. Vasconcelos dehan katak situasaun hirak iha loron ikus fula Setembro nian ne'e hetan is hosi petroleo nia folin nebe as ba bebeik, maibe ida ne'e hatudo notisias diak ida ba Timor-Leste.

“Ajustamento temporario iha mercado sei hare bebeik, bainhira obligasi ne selu osan funan nebe fixo nebe Governo Estados Unidos sei fo fila fali tuir osan inan (valor nominal) molok tempo ramata. Variasaun hosi mercado nebe akontese entre bainhira sosa obligasi ida ho nia data simu fali osan inan, ami fo sai dadauk ne'e tuir requisito hodi sukat valor Fundo nian tuir normas internacionais contabilidade nian,” nia explika.

Ponto importante hosi relatorio trimestral ba dala uluk ida ne'e, nebe abranga periodo ida nebe seidauk to'o fulan ida, loron 30 Setembro 2005, inclui:

- Saldo abertura ida ho \$125 milhoes nebe transfere mai hosi Fundo Consolidado
- Transfersia ho \$80 milhoes mai hosi konta “Timor Gap” nian iha ABP
- Receitas hosi contribuintes (pembayar pajak) hahu Agosto to'o Setembro, ho valor \$43 milhoes
- Karteira investimento iha loron ikus Setembro nian ho valor \$247 milhoes
- Fundo simu fali ona rendimento \$611,000 konta hosi loron hahu investimento.

Relatorio trimestral ida ne'e, hanesan mos Lei Fundo Petroleo nian ho Contrato Gestaun Operasional nian, bele hare iha Autoridade Bankaria no Pagamentos nian iha: www.bancocentral.tl no mos Transparência Timor-Leste nian iha: www.transparency.gov.tl.

Precisa karik informasaun ruma, bele kontakta:

Maria José Sarmiento,
Directora Interina do Fundo Petrolífero,
Autoridade Bancária e de Pagamentos de Timor-Leste
E-mail: maria.sarmiento@bancocentral.tl
mjjsarmiento@yahoo.com
Telf: +(670) 7230974

Fim

18 Novembro 2005